

**Inatsisartut Peqqissutsimut Ataatsimiititaliaata**

**Imeruersaatit qimmassaatinik akullit aamma energidrikketut taaneqartartut meeqqanit 12-it ataallugit ukiulinnut pisiarineqarsinnaanerisa inerteqqutaalernissaat inatsisiliuteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

*(Inatsisartuni ilaasortaq, Malik Berthelsen, Siumut)*

pillugu

**ILASSUTITUT ISUMALIUTISSIISSUTAA**

**siunnersuutip aappassaaneerneqarnissaanut tunniunneqartoq**

Inatsisartut Peqqissutsimut Ataatsimiititaliaat suliarinninnermini ukuninnga inuttaqarpoq:

Inatsisartunut ilaasortaq Olga P. Berthelsen, (I)

Inatsisartunut ilaasortaq Debora Kleist, (I)

Inatsisartunut ilaasortaq Malik Berthelsen, (S)

Inatsisartunut ilaasortaq Hans Enoksen, Siumut

Inatsisartunut ilaasortaq Astrid Fleischer Rex, (D) - Knud Fleischer-imut (K) sinniisussaq

Inatsisartunut ilaasortaq Kim Kielsen, (S) – malik Berthelsen-imut (S) sinniisussaq

**Aallarniut**

Ulloq 28. marts 2011 Peqqissutsimut Ataatsimiititaliaq uuma siunnersuutip aappassaaneerneqarnissaanut isumaliutissiissuteqarpoq. Ulloq 30. marts 2011 Ataatsimiititaliaq isumaliutissiissummut iluarsissuteqarpoq, siunnersuutip Ataatsimiititaliamit suliarineqarnerani isumaliutissiissutip immikkoortortaaani partiimut Atassummut kukkusumik innersuussisoqarsimasoq malugineqarmat.

Taamaattumik ulloq 31. marts 2011 siunnersuutip Inatsisartuni aappassaaneerneqarnerani Peqqissutsimut Ataatsimiititaliap siulittaasuata kissaateqarneratigut siunnersuut nutaamik Ataatsimiititaliami suliarineqartussatut innersuussutigineqarpoq, immikkoortumi tassani partiimut Demokraatinut innersuussineq aamma kukkusuusoq malugineqarmat. Piffissami tassani siunnersuutip aappassaaneernissaa ulloq 6. april 2011-mut kinguartinneqarpoq.

Tamanna tunuliaqutaralugu siunnersuutip aappassaaneerneqarneranut iluarsissutitut ilassutitut isumaliutissiissut matumuuna Ataatsimiititaliap tunniuppaa.

**Siunnersuutip Ataatsimiititaliamit suliarineqarnera**

Ulloq 1. april 2011 ataatsimiinnermi siunnersuut Ataatsimiititaliap suliarivaa. Ataatsimiinnermi tassani Kattusseqatigiit Partiiat sinniisuutitaqanngilaq Knud Fleischer-ip peqanngikkallarnera pissutigalugu Astrid Fleischer Rex-imit Demokraatineersumit sinnerneqarpoq.

**Allannguutissatut siunnersuut**

Ataatsimiititaliami amerlanerussuteqartut Inuit Ataqtigiinnit aamma Siumumit sinniisuutit Atatsimiititaliami oqaloqtigiinnerit aamma misissuinerit tunuliaqutaralugit allannguutissatut siunnersuut kingulianiittoq saqqummiuppaat:

**“Imeruersaatit qiimmassaatinik akullit aamma energidrikketut taaneqartartut meeqqanit 18-it ataallugit ukiulinnut pisiarineqarsinnaanerisa inerteqqutaalernissaat inatsisiliuuteqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut.”**

Ataatsimiititaliami amerlanerussuteqartut taakku allannguutissatut siunnersuummi pissutaasut 28. marts 2011 Peqqissutsimut Ataatsimiititaliap isumaliutissiissutaaneersut kingulianiittut immikkut erseqqissarumavaat:

*“Imeruersaatit qiimmassaatinik akullit aamma energidrikketut taaneqartartut meeqqanit 12-it ataallugit ukiulinnut pisiarineqarsinnaanerisa inerteqqutaalernissaat inatsisiliuuteqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut, ataatsimiititaliami eqqartuinermi Inuit Ataqtigiit Kattusseqatigiit Partiaat peqatigalugu siunnersuummut naaperiaatit imeruersaatit pineqartut 18-t ataallugit ukiulinnut pisiarineqarsinnaanersisa inerteqqutaalernissaat allannguutissatut siunnersuutigaat. Allannguutissatut siunnersuuteqartut ilanngullugu erseqqissaatigiumavaat imeruersaatit pineqartut tuniniagaanerini erseqqissumik paasissutissiisoqarluni allagartalersuisoqarnissaannik soorlu, imeruersaatit annertuallaamik imerneqarnerannit meeqqanut, inersimasunut naartusunullu ajoqutaasinnaaneranik takoqqusaarusiortoqarneratigut.”*

Ataatsimiititaliami ikinnerussuteqartoq Demokratinit sinniisuutitaq aallaqqaammut siunnersuut imaluunniit allannguutissatut siunnersuut siuliani taasaq tapersorsinnaanngilaa.

*“Demokraatit inassuteqarput siunnersuut aamma allannguutissatut siunnersuut itigartinneqassasut.*

*Demokraatit inerteqquteqarnissamut isumaqataanngillat, angajoqqaat meeqqamik suut imigassaattut naleqquttuunnginnersut siunnersussallugit namminneq akisussaaffigigaat isumaqaramik. Taamaattorli isumaqarpugut qaammarsaaneq aqqutissaasoq. Meeqqat inuusuttullu koffein-imut taassumallu sunniutaanut meeqqat inuusuttullu sunnertianerusut amerlanerusunit paasineqarpat, innuttaasut namminneq meeqqatik imeruersaatinik qiimmassaatalinnik imertariaqarnerisut nalilernissaanut periarfissaqassapput.*

*Taamaattorli Demokratit siunnersuuteqarput niuertarfinni Fødevarestyrelsen-ip inassuteqaataanik allagartaliisoqarsinnaasoq:*

*Meeqqat aqqaneq-marluk ataallugit ukiullit “imeruersaatinik qiimmassaatalinnik” iminnginnissaat kiisalu 13-init 18-inut ukiullit*

*“imeruersaatinut qiimmassaatitalinnut” tunuarsimaarnissaat  
inassutigineqarpoq.”*

**Ataatsimiititaliap inassuteqaatai**

Immikkoortumi uani inassutigineqartutut allaqqasut 28. marts 2011 Ataatsimiititaliap aallaqqaammut inassutaannut taartaapput.

Ataatsimiititaliami amerlanerussuteqartut Inuit Ataqtigiinnit aamma Siumumit sinniisut ilassutitut isumaliutissiisummi allannguutissatut siunnersuutitut allassimasoq **akuerisassanngorlugu inassutigaa.**

Ataatsimiititaliami ikinnerussuteqartoq Demokraatinit sinniisuutitap ilassutitut isumaliutissiisummi allannguutissatut siunnersuutitut allassimasoq **itigartitassanngorlugu inassutigaa.**

Taamatut oqaaseqarluni Inatsisartut Peqqissutsimut ataatsimiititaliaata siunnersuut Inatsisartuni aappaasaaniigassanngorteqqippaa.

Olga P. Berthelsen,  
Siulittaasoq

Debora Kleist

Kim Kielsen

Hans Enoksen

Astrid Fleischer Rex